

喙

鳴

文

集

喙鳴文集卷十三目錄

冊文

擬孝懿皇后謚冊文

致語

慶成宴致語

策問

會試策問三道

雜問十四道

贊

觀音贊

黃后川公贊

陳文端公贊

章一陽公暨兩孺人像贊

葉侍郎父養利守像贊

屠少司馬及子田升小像贊

句章公贊

寫真自贊八首

憶婦

長孺七弟贊

伊尹耕于有莘贊

馴象贊

銘

壽卮銘

應制硯銘六首

雜銘七首

箴

財箴

事箴

筮箴

寢箴

歸寧箴

治病箴

閒居箴

綏神箴

言箴

言

戲竹言

戲作責鏡言

喙鳴文集卷十三

四明 沈一貫肩吾 署

冊文

擬上 孝懿皇后謚冊文

伏以紫庭儷正徽稱夙賁于中闈律谷生暄穹典  
載升于太室節繁聲于瓊宇鏤遐軌以瑤函恭惟  
皇妣孝懿皇太后德厚方祗章含圓照名閨吉產  
祥流寶婺之輝婉德秘儀彩備瑤繩之爛應 聖  
祖鳳占之兆配 先皇龍德之潛內則孔脩式稱

展祿之服婦功敬執彰施黼黻之文思覃魚貫之  
均慶洽螽斯之盛授神媒之弓矢開奕世之箕裘  
地其處乎萬物仰天生之助風之始也二南弘聖  
化之基夫何蕙問不留蘭儀遽掩先帝感來遲  
之痛峻烈榮升冲人抱生晚之嗟孝思靡及聞音  
容于旦夕增悽愴於春秋是率前章適稽內令儼  
光儀于金祀崇位號于瑤齋謹奉冊寶上尊謚曰  
某皇后於戲虞幄二嬪首懿娥皇之德周幃三母  
特標太姜之名尚妥宸儀備潛景制禕儉舊飾毋



天下于當年鍾鼓新宮配至尊于萬世

致語

慶成宴致語

館課

臣聞圓丘報祀皇穹兆集于三壇紫殿垂慈帝澤  
欣流于百辟昭三酒燕衍之惠罔一陽復始之和  
大慶溥宣群情盡洽恭惟 皇帝陛下應天受命  
括地登樞正顯位于域中化不言而自運昭大明  
于天下功寂若而已神既峻德以配天遂至仁而  
饗帝祇候迎長之日悉徵掌故之儀浥元氣于無

垠儼清都千有象揚六鸞齊八駟冲融玉步之和  
奏九樂邸四圭煜燁金泥之潤儲德馨而上達錫  
羨福以紛來珠斗璇杓玉宇燦嘉歆之象祥風朗  
月神光呈閔饗之符晷緯交熙朗玄暉于紺宇零  
霏悉屏赫峻命于明庭乃昭大禮之成爰敞廣筵  
之賜造化為宰同加元氣之餐陰陽作庖並進太  
和之酌藻服垂帶卿雲麗于中天旨酒盈壘湛露  
均于下土金石寫山呼之曲魚龍騰海晏之歌徵  
招角招詎獨君臣之相悅擊石拊石尤欣鳥獸之

咸和臣等職在賤工身逢嘉會宜陳口號上懌宸  
顏玄丘昨夜擁祥烟紫極今朝敞御筵泰日瞳矐  
迎綉縷需雲繚繞護花韞氣烝魏闕魚龍煖春入  
堯階草樹妍此日宸遊歡未極誰能不醉賦歸旋  
策問

會試策問三道

問書稱率乃祖攸行夫治者豈無三五而必祖之  
法謂體所自出而尊親加焉憲度著明易則也我  
高皇肇恢大明治功冠于千古誠聖子神孫所當

法而當是時制度亦屢更律令至五六易始或以  
草昧從權或以亂國用重然則躬親之有不盡仍  
而欲世世循用可歟自永樂洪熙以來故老相傳  
咸謂 宣廟以寬定之 憲廟以靜培之 孝廟  
尤以深仁厚澤至于今利賴此皆所謂善繼善述  
匪惟無改已也然歟否歟 皇上續基御曆或者  
仰窺以為法 肅皇 肅皇功德爛然享國長久  
諸所規厝出恒情表而災亦時有無損治安以今  
軌跡蓋亦近之意者淵微之中誠有所獨契歟夫

均祖也而獨法一祖孰與並法諸祖即法祖當有神理往來于精眇間不徒踵其形似也諸士逖觀而族談久矣其試礲焉

戊戌會試

問吐握下士古為美談而李文饒王介甫皆著論非之何也文饒猶言周公則可介甫直謂荀卿之妄豈其然乎顧其論雖爾而門雜是亦不能副其言矣長平不與招士而門有田任則未嘗無士平津下士而武帝發十策不能得一則未嘗有士張安世婁師德之倫姑無論乃若山濤羊祜王旦王

曾之賢皆兢兢慎密而不欲有薦士名何也豈集  
思廣益以人事君不惟一二賓客之為視聽歟彼  
破散私門以為公朝法家之言雖過不有吾儒散  
小群成大群之說乎欲挽回世風戮力時艱宜莫  
先于此今主司將諸士入青霄豈忍使與槐柳同  
列亦宜預辨矣

戊戌會試

問今天子守在四夷靡兵革之事虜三世拜王爵  
古所未有然所部尚有順有逆有時順時逆詔令  
順則羈逆則絕一歲順則一歲羈一不順則絕廟

謨豈不宏遠哉諸將宜如何西陲數戰嘗懼其疲而蜀故無虜患今亦見告收番制虜又宜如何西南則緬甸嘗梗矣頃稍就平宜若為撫諸內地夷必使之長震讐懷服無敢後何術而可安南昔人謂封之不如絕今復為黎自縛請命以都統使羈之果得策否南方之夷為狴為獍為蜚為蠻種類甚多又海外國無慮數十行貨于閩粵間得無有它虞否曩倭闕東南久始殲之而比入朝鮮則或棄或戍或封或剽為議不齊上赫然致師而煩費

久勞亦所不忍此尤策之所宜亟圖也王者之治  
詳中國略四夷顧不得置四夷不問茲欲總攬長  
策柔遠能邇收效于千羽著圖于王會何脩而可  
以臻此 戊戌會試

### 雜問十四道

問古者國子舍於王宮教於師氏時會於大司樂  
萬民居於比閭教於塾師時屬於州序其教則五  
事五典其學則六德六行六禮六樂五射五御六  
書九數少而習焉長而安焉故教化行而風俗美



也後世小學既廢不講大學亦虛有名雖曰明經  
實則無用口先王而行乃出衆人下至有濟穿窬  
之私者風俗之壞極矣教職雖卑胡可易稱哉昔  
湖州教授以經義治事作人楚州教授以治心養  
氣作人學者稱盛今可取為式乎所以異古大小  
學之教而自為一法者何意抑兩先生固有足稱  
此非所以教乎今不敢遠望諸士如三代如兩先  
生可以挽世矣不宜妄自菲薄而已若自比抱關  
擊柝之吏而責門弟子不為衆人之行可得哉其

試言志勿隱

問古稱仕而優則學學而優則仕學而仕無論已  
仕而學無乃廢時失事乎或謂學在脩己不在誦  
讀然子路言何必讀書而夫子非之公明宣三年  
不讀而曾子非之則古之人亦誦讀已顧仕何暇  
而能無也觀夫日燭之喻青藍氷水之喻蓬麻芷  
漭之喻百川丘陵之喻刀礪玉錯之喻玄室白日  
之喻古之急於學如此宜仕而不廢今之仕者一  
操簿書便與此業永隔豈非學以為人仕以為己

耶彼猶可諉曰仕乃博士家則學亦仕仕亦學廢學無仕願聞諸子仕而學之道

問古者國子教於師氏庶姓教於塾師皆非常廩之士也郡縣養士從何代始即古塾師之意否乎我國家令甲吏毋得仕於其鄉而近獨許教職仕於其鄉似非典制又令甲七十致仕而近者正貢或遲暮有入仕於致仕之年者恐曠官也禮謂鄉先生教於閭塾傳謂大夫七十致仕入學為餘子師則仕於鄉仕於老未為不可今與諸生商略其

懷至公定經制毋苟便已而已

問間之古蜀未有學學自文翁始至今蜀有文翁  
講堂閩未有學學自常袞始閩人春秋配享袞于  
學宮然文翁子弟張牀等未有聞而同時司馬長  
卿不在教內顧以辭顯然則蜀學似不專起於文  
翁獨孤及稱閩中無儒學福州都督李成公至而  
俗易則閩學不專從袞起也豪傑之士代興忠信  
之質邑有而謂蜀閩無文學至二子始起吾所未  
信請試言之

問治天下惟慶賞刑威二者而已書稱惟辟作威  
惟辟作福刑賞人主之柄也柄在人主當惟其所  
欲為而古乃有不賞私勞不罰私怨之訓安所稱  
惟辟哉刑賞不私雖獨制可而古又有與衆共之  
與衆棄之之訓必衆然後為無私歟虞有五服五  
章五刑五用周有八則八柄而刑之屬至三千亦  
大煩矣聖人豈無意歟又有云賞僭懼及淫人罰  
濫懼及善人不幸而過寧僭無濫刑賞一也胡賞  
可過而罰不可過歟夫刑賞原於功罪功罪故未

易定也人固有一得一失瑕瑜不相掩者又有乍  
賢乍佞蒼黃不能辨者斷之獨既為私謀之衆未  
必公何道而稱定論古之所以寧僭無濫者豈亦  
以論之難定不得已而出于厚歟易曰君子以遏  
惡揚善順天休命刑賞失中無以治人且非所以  
承天也具陳無略

問陸子靜少時問天窮際父笑而不答至廢寢食  
思之不得後悟而稱東西南北四海千萬世上下  
有聖人出此心此理同也竟不明言何窮際豈即

邵堯夫天地自相依附之說耶曆家渾天旋轉之說耶即依附旋轉已其外竟何窮際又雜家九野九州道家四人天三清大羅天釋家二十八天四洲華嚴藏世界天其誕殊甚亦不能言其窮際然則天之窮際善誕者無如之何也如曰積氣積氣之外何極曰積形積形之外何極吾思而不得其說諸生豈無子靜聊為言之不必繁稱博喻苟解吾惑一言不為略已

問學貴通方士取適用方諸生之業於膠序間也

不過治經史習文字高者談性命篤行誼居為家庭孝友之士出為人明師此亦布衣之特矣然事固多塗而理難獨用諸生知之乎國家網羅賢豪材之於庶僚庶寮之事宜恪守功令視故府之憲於經史為異習治書牒期會於文學性命之言為異便治衆涖民勛勩紛囀於行誼惇謹信美又非所宜用且學者嘗詆管劉而今治鹽筴嘗詬桑孔而今治財賦嘗譏申韓而今治刑名嘗羞衛霍而今治師旅舍前日之學為悖從前日之學為拘脩



身者競為高而不合於功謀功者務為便而不揆於道今昔之際從舍之權必有概於中矣其悉言之以觀有體有用之學

問班氏贊漢高之興有五陸贄表唐太宗之美有六曾鞏稱宋藝祖不可及有十邵雍稱宋治唐虞而下所未有者五呂大防稱宋家法遠過漢唐者八古今以為知言我朝立極置法皆超前古如宋濂敘贊大明日曆者六謝鐸稱度越歷代者五陸文量稱度越前代者六可悉數之歟豈舉一廢百

不免蠹測筵撞之譏歟昔伊尹明言烈祖之成德以訓於王周公作無逸舉三宗以勸成王訪落一詩又以盡下情守家法為說則祖宗謨烈後之所當知也試陳說焉

問夏書稱賞延於世文王仕者世祿小雅裳裳者華刺幽王棄賢者之類絕功臣之世然則世祿古之道也周書數紂之罪則曰官人以世公羊氏亦云詩書春秋皆聖人之言而違戾若是將焉折衷哉有周之時王子公子策勲標名於當年者不可

勝數即後代若漢唐與宋貴相望於後先也迺今天潢麗億希登仕版公卿任子率不得與進士齊顯雖在制科且有與寒畯爭進之嫌是遵何說哉揆之王者至公恐不宜有偏私也吾嘗觀杜牧上宣州書實痛之或者謂宋時宗學嘗寬收矣卒無見其異任子之典最厚而議者屢欲裁減此亦無用之驗也然歟否歟

問孟子稱不嗜殺人者一天下以不忍人之心行不忍人之政者保天下此語上下古今不爽毫髮

嘗思古之創業者自武王以來皆未及身致太平而必藉於繼體也惟我皇祖起淮甸十餘年而平天下又宅金陵三十年而定天下既以不嗜殺人一之又以不忍人保之顧人知聖人謨烈之盛而不知默運之謂何諸生豈能仰窺其萬一乎不然不嗜殺之心與不忍人之心苟以英傑自命者誰不然而獨稱大聖人作為也

以不忍之心行不忍之政聖人心如鏡體與物對照中間不隔一塵今人被形骸窒礙又讒諂

面諛及法度體極窒礙不獨一塵如何對照聖人之為民如禹之治水念惟到海有委有曲意第東之而已鯀堙鴻水為曲徇人情故也高皇之心如鏡政如治水納交要譽惡聲都不能動建萬世之業不獨才大只為心真念念在閭閻之下武王以後未有如此之切者

問沛公素貪財好色一旦入關財物無所取婦女無所幸而為范增所疑幾殺其身項王素嗜啞叱咤一旦不殺沛公有君人太德而竟亡其天下然

則德有所不可用仁有所不可行歟

問古之君子豈不愛君然曰量而後入信而後諫則疑於觀望曰將順其美匡救其惡則疑於依違曰納約自牖遇主于巷則疑於曲學事君有犯而無隱豈不毅然人臣之義哉而委曲如是豈不以堯舜待其君乎然孔子亦曰諫有五吾從諷焉諷必有道矣豈如今之人頌而後諫頌可矣而曲為之詞以扶其說啟人主遂非文過之端勸百戒一所得無分毫兩所喪若丘山人臣之義必不宜爾

古之君有戒上書不得稱聖者縱不折檻牽裾引桀紂幽厲危亡之言而時時稱聖將謂詭可以行正諛可以成忠乎傷人主之德害人臣之義諸子行將事君謂吾言當否

問當世之務至多然邊急矣雖老於疆場者不得其要領何遽與諸生言顧國家大勢古今成事亦諸生所宜及也今 皇帝聖武孰與 肅皇帝天下物力蕃人才多孰與嘉靖時然 肅皇帝南絳粵北絳胡不能夙夜寧而今南北大捷一日至抑

何烈也夫老氏戒佳兵道家忌陰謀不戢則焚孫  
吳亦云然武帝之窮黷而或躡其數世之功宋事  
一失於岐溝再失於澶淵而終代以為悔則又何  
說也 高皇帝為天下請命既逐胡矣復遣大將  
隨而蒐之 文皇帝享成業亦三犁虜庭聖人之  
心計萬世耳觀祖訓垂慎毋好戰之文及伸戒好  
生而即日旋師可觀也今談者悔東勝之棄彼閉  
關謝者非耶冤維揚之戮彼抑靈荃者非耶昔蘇  
氏兄弟好言兵晚不言兵今天下言兵與不言兵



孰便又謂自古介冑言戰儒者守和而今介冑言和儒者言戰何其異也請究言之毋略

問治必有萬世無敝之策非可持兩端也吾觀自古執簡者多不知當事之意虛傳失實寬仁而曰刻膚德化而曰嚴理楚獄甚蔓而曰柔道世固有猛其實而寬其名者乎至如漢唐之二宣宋之神宗皆厲精核實而或稱文具或稱勞攘世固有詳其名而踈其實者乎魏鄭國謂行帝而帝行王而王何三代而下寥寥也大抵理民定國者各用其

質遠與時會則定否則亂故網漏吞舟之魚亦治  
豈治在附民不必多為之法乎或者謂一代之興  
必有一代之規摹漢曰制度唐曰紀綱宋曰家法  
乃我朝之立國規摹安在談者稱大誥則既凜  
凜矣世可以凜凜治歟策士者大抵以意示士亦  
苟附意而已不盡所懷來今主司佇虛士且吐實  
儻有賈生治安王吉建策匡衡審尚於此言已  
治國家者當以剛柔詳略叅也二事不能無所  
謂質與時會則定否則亂也聖人時剛而剛時

柔而柔時詳而詳時略而略不見其端漢高祖  
雖寬而秦法本嚴數世之後談者猶曰十失尚  
在文帝之仁猶有嚴名胡元之季廢弛極矣

聖祖以法繩天下而世以大定從民欲也大定  
之後稍從輕典且誠後世子孫毋苛如律而止  
此所謂能剛能柔也論者徒謂本朝立國以嚴  
失之矣至欲以為規摹而世守之尤失之矣張  
弛在御剛柔惟化此兩者胡可一日偏哉故治  
天下者惟問時宜不必問規模前人失之吾得

之可也前人略之吾詳之可也前人有之吾略之亦可也要歸於適人心不古惟視上旨觀嚴則靡而嚴觀寬則靡而寬壞天下者盡若徒也若夫法度紀綱何可一日廢此不在寬嚴之數猶天之上地之下不在寒暑之數也

贊

觀音贊

以自在心發遍觀智施一無法除五怖畏度盡衆生無有度處法海無波慧日不曠非男非女寶蓮

花位是闍婆影非菩薩記有佛無佛世間常住但  
捨業果便登覺樹投種若大結果不細欲見觀音  
如是如是

黃后川公贊

神澄於水而氣溫於真體不勝襍穢而名重於鼎  
彝當其懷明發吹埴篴佩弦愛鼎知雄守雌是謂  
人倫之白眉當其廐不栗園不葵象胥奏勸鳧邑  
宣慈是謂薦紳之紫芝壯歲辭榮終身樂施止脫  
巾而助餉揅大侵而設糜則金湯且藉以匡持吁

嗟蒸民其三代之遺乎

陳文端公像贊

絡彼坤維名山惟岷緒此臣紀名公惟陳醞道釀  
德服義揚仁譚堯舜以匡主指稷卨以許身雲龍  
一時風猷百世有岱丘華砥之嚴重有膏液曦光  
之和粹有虛淵邃谷之茹納有畫畛縈井之康濟  
隱靈樞于密揆顯昌言于平世為霖幾何還岫太  
早至人不以極施為庸善射不以末勢為巧惟豐  
其儲廼饒其餘象公象于嗣服襄皇輅于今茲夫

日月高而能卑山川蘊而能施師之神日經于天  
猶心帝室宜帝薦命于奕世謂舍師其誰

章一陽公暨兩孺人像贊

於維章公志高嶽立善下水平輯族以德一衆匪  
刑人操朗鑑物罕遁情雖抱璞不售而世賞其連  
城矧燕翼是貽而凡宗者一經亦有孺人相公于  
成前離祉而後服荆曰厥胤之孔明吾以歸之先  
生雖謂先生歷千載而愈聲可也

葉侍郎父養利州守公像贊

粲粲雙瞳有星其輝英英眉而有虬其威經明行  
脩為後覺師何自咄嗟不翺于遶一乘江洲五斗  
彭澤詎真詎攝為哺為翼漂漂朱崖寧綏擴域詎  
非赤子不為衽席節庶孝忠鬼神所通社而稷汝  
匪民伊公有子矯然雲津翼龍吾知百年流響于  
冊

少司馬竹墟屠公暨子田叔贊

屠公我峨榦豐髯美襟靈朗邁神儀軒偉清唯恐  
知功而不恃有語皆寂有動悉止丹青者誰似知



公裏田叔過庭炳文蹈軌仕林後集道心遐舉邈  
矣悠哉是父是子

族父句章公贊

世霞構營靡不儒不墨而獨掉鞅於無窮靡不立  
不宅而獨挫悅乎鼎鍾窘世而寬其一宮屈俗而  
信其一胸筆攝萬有墨濡八衢若芒霄之虹蕩空  
之龍且以方羊且以雍容蓋珥筆執簡以事玉皇  
者由布衣而益雄也

寫真自贊八首

道則勇於敢不道則勇於不敢勇於不敢者小心  
勇於敢者大膽誰非吾人而昵妻子誰非吾身而  
貳生死空無物而景附千真屹不動而闡藏萬鬼  
不可得而親踈誰能為之議擬

名師魯國字依岱宗號障百川之下意回狂瀾而  
東學宗易象道在中庸闡然日章晝知夜通

嵇生本懶而藏之不密故終愧千孫登翔脩鯢于  
碧霄奚萬夫之可習乃知子房赤松方朔歲星造  
有天幸豈其固能吾安得遂吾之初恢遠將之騫

騰托諸縑素時卷舒之聊自恣其狂矜

此輪王乎此如來乎此楊虎乎此仲尼乎以為廟中之犧以為泥中之龜我不敢辭我不敢知不能無為亦不有為吾何求哉吾將任大化之所之亦計窮力竭于是乎詞

五十非夭爾踰六十或問之年必云宜及老而不死恩傷令名胡不遄歸是曰順寧顏氏之子三十有二爾今倍之六旬加四彼夭而德此壽而涼朝聞夕可猶庶其償

通達之中若存若亡且乘白雲遨于帝鄉白雲不  
愁爾復何憂毋以鶴列陣之蝸牛

感忠孝之傷生兮非余膺之所難死衽席與都市  
兮咸生順而死安

人倫有五幸全者四其一朋友非余之累束躬引  
避而不得去竊武本愚何能無智天道無全況余  
寡昧不慙高穹不羞厚地南方之強反揆其庶

憶婦

昔筮盍簪今嗟炊臼匪喪同衾實亡益友每對偏

妻輒思主母小星自明月華何有

長孺七弟像贊

痛予兄弟自相師友夙夜所祈於天無疚弟授屯  
部已多建明尋丁內艱動合天經起補入邸力讓  
銓曹退就儀郎百度孔昭諫上嚴刑幾蹈斧鑕  
辭旨侃侃絕大文字立儲諸草語多鴻碩一時  
名公並皆嘖嘖特辭卿寺又辭大叅并謝督學出  
鎮荆南楊酋煽亂蜀借楚兵衆咸色阻弟許先聲  
監軍傳檄酋即就撫當事首薦曰無文武予既拜

麻遂乞終養甘旨十年為樂無量臺省交辟 詔  
除閩漳紅番蓄謀內結橫瑯事且大裂予身抗言  
廟堂韙之造福萬年向緣倭市欲經吾鄞百計拒  
焉弟同此心時應開府弟必不可平調天雄就義  
何果僅遷夜郎人嗔我樂惠綏凋弊猷弘盤錯萬  
里朝 天䟽還初服一瘍不起慟滿山郭唯弟生  
平人頗仰止此數大節或未盡耳更為闡幽清真  
畏知默默援人人聞者希憶章百上乃遂首丘伊  
誰贊之相知子由天之君子今之古人位不配德

豈縈弟心覩茲遺像灑泣千行聊題短贊付名山  
藏

伊尹耕于有莘贊

方夏日之正焦時商雨之未降辟駟車于人間靳  
一介于隴上即無強力忍詬之名無過郊鄙朴愚  
之狀如腐化于一物詎佐時之顯相嗟古今之耕  
疇何泯泯之可量

馴象贊

誰謂汝角胡然下指誰謂汝尾胡然前委匪尾伊

鼻匪角伊齒齒可壯威鼻無攝理偉此大物馴然  
可簪識地虛實復知拜跪眸子如豆眠遐及邇目  
大不運亦異乎彼葆肅皇家莫呵而止率舞蹱蹱  
百獸所視

銘

壽卮銘

壬午歲恭製上大人觴

曰時春熙壽域迎和光奉寵綸天貺渥多悅豫且  
康福履無涯子孫燕喜屢舞繁歌帝念稽古小臣  
拜嘉規模象犧榮君於家以寫柘漿斟酌流霞卷



韞鞠騰泳游恩波天地錫美日月凝華千祥鼎來  
萬齡有加

應制硯銘六首

文不生於文而生於質樸重端確至文乃出

雖有美璞追琢斯章是石不鑿在山之陽既磨既  
礪為龍為光

於此擣文思其質於此揆政思其實法其清靜保  
元吉

雖與墨相比勿令垢且膩雖與筆相染勿令汙且

黔

其質隆厚其用長久雖曰長久善保斯壽  
誰謂勺水波濤翻瀾誰謂尺霧雷電輪盤字不苟  
造天下永安

雜銘七首

與其豐於入也寧儉於出儉出則纖豐入則婪銘  
遲明而開無後時一日後時凶神窺之銘

誰謂汝启嚙枚服襄誰謂汝閉材官蹶張呼陰吸  
陽斯鎖鑰之藏銘

禮無隆殺無小大誰非賓者往遇必戒抗節不以

貌無以色逢害

門銘

不勤冀天益汝寧三年

賈銘

欲斬諸魔先馘魔王鑑貌辨色俾無內藏

鏡銘

睨而視亦睨而視匿而視亦匿而視天鑒孔明誰

能逃此

鏡銘

箴

財箴

小人之財生於力君子之財生於德財不易得所

宜惜然臨取予不可以惜財之心為主惜財必畱  
於施而豐於取惟有道者為能制財毋為財所制  
哉

事箴

事固有兩適道固有兩陳天倫與父命孔子皆稱  
仁使齊曰父命而夷曰天倫可乎不可乎梟獍而  
稱人事固有兩適君子慎厥身

筮箴

有序

余少時妄意天下筮所主得家人五大有

二庚辰辛巳危疑甚皆以冬至日得咸四  
夜半偶理前筮牽連為箴曰

王假有家交相愛也大車以載積中不敗也貞吉  
悔亡未感害也憧憧往來未光大也

### 寢箴

至人之死不尸而夫人之寢尸也故至人之死猶  
生而夫人之生死也寢以息生乃得死貴寢哉縱  
不能坐不卧脇猶可

### 歸寧箴

涉世百年歸來無一事梗刺其膺乃可稱歸寧

治病箴

治病無他奇克而通之不克無以扶衰不通則有生生厚之災

閒居箴

閒居念四方四方如閒居此之謂夫

綏神箴

館課

維帝稱尊維神之靈既型既范函余以形形不虛鑄有神則疑出鬼入帝吐清喻寧昧昧者何乃肆

憑凌創以戈鋌穢以膾腥淫康流漫墜神於水追  
趣銜鬻輟神於乘亦有世賢於焉稍懲索之茫茫  
寄之冥冥出入無鄉與物相刑同歸於墜愁其明  
廷吉人維何吐辭為經神之聽之則莫敢不承吉  
人維何履絢載繩采齊肆夏罔矜與辨我儀刑斯  
而日競競以宵以夙以蔡以徵勿謂無何維神星  
星一瞬黥之終天不熒神止無居神行無輟神來  
無迎神往無扃伊神所欣翼翼矜矜進墜非遙在  
覺與夢故曰從善如登從惡如崩寂兮寞兮神之

宅清兮靜兮神之庭小子不敏敢敬斯銘

言箴

少時作

古人耻躬君子顧行墻固有耳天亦能聽堂既能  
虛谷復能應齒牙之論徒為輔頰之騰非勝善則  
心聲惡則身殃善則福永惡則禍長慘于劍戟彌  
天播毒芬于芝蘭終古流芳惟口興戎惟口起羞  
玉有玷而難磨三復所以感聖金有口而須銘三  
緘所以箴周辟戶之樞關之難為闔辟弩之機脫  
之難為收譬之風波風波易以動譬之枝葉枝葉



易以稠一言而興喪殊一言而智否判第星徙舍而去彼蒼為格老羸扶杖而來大號攸渙語期于立不期于驚人令期于行不期于反汗喋喋非長者事宜為漢弃談談異黃髮疇因非秦善尚為及晨之鷄毋作能鳴之雁感逸駟之難追而留之于舌念鳴鶴之必和而慎之于室戒彼南箕為播揚之官瞻茲北斗慎喉舌之出竊之不言言必有中賜也不幸何取多言死者復生生者無愧未言而信信在言前口衆而我寡奚害于括囊悖出而悖

入徒勞于防川寧默默而無揚無嘒嘒而殺身存  
舌得官竟遭夫轅裂據梧哆論終召夫坑焚榮華  
之後必有茅史巫之吉豈其紛彼其桃李之蹊交  
跡者不少矧伊溫室之樹側耳者多有掩子之盜  
漿尚虞其露出爾之戶庭庸迓其咎戒失身于不  
密宜知幾而固守毋令人目為傾城之指嬖毋令  
人目為覆邦之利口好盡以招人國武子所以見  
殺未唱而常和氣貽他所以著稱毋以幕叛毋以  
臺傾守之如瓶防之如城擬之而言議之而行擬

議以成其變化。今固有不言之教無形而心成者耶。

言

戲竹言

誰謂汝挺葉齊而俯似爾為。孫當勝其祖。誰謂爾空有闕不通似爾為。禪當空其中。謂汝傲雪凌寒背。執胡鞭之南。憚于北。發謂汝羸糧餐鳳樓。皇胡起之粟。輒萎以黃。人有恒言。責賢者備。我今窘汝。令汝置對。惟肉可舍。惟貧可交。請從爾居。天保之

苞

戲作責鏡言

誰謂汝不爽給右為左亦汝之罔誰謂汝不欺張  
羸為肥亦汝之疑處暗能明向明反晦豈其用智  
人覲如烟不覲若盲豈其無情兩相乘則影沉沉  
不知其幾千萬尋又胡多心謂汝無來不照不遁  
其影從旁窺汝汝亦莫省俯仰隨人面從背違曾  
無趣操何方之依

喙鳴文集卷十三終

喙鳴文集卷十四目錄

墓誌銘

大學士陳玉壘墓誌銘

贈大司馬楊次村墓誌銘

大司馬趙劒門墓誌銘

代趙師作

少宗伯瞿昆湖墓誌

代李師作

少司馬屠竹墟墓誌銘

少司寇張敬齋墓誌銘

按察使李于鱗墓誌銘

代殷師作

戶部員外郎劉見台墓誌銘

都督僉事沈坦庵墓誌銘

錦衣衛指揮沈葑庵墓誌銘

武邑知縣鄒龍巖墓誌銘

孝義先生吳公墓誌銘

郝廷符父母墓誌銘

蓬溪知縣賀公墓誌銘

喙鳴文集卷十四

四明 沈一貫肩吾 著

墓誌銘

太子太保禮部尚書文淵閣大學士贈少保  
謚文憲王壘陳公墓誌銘

萬曆甲午余與南充陳公並命入閣公既數月而  
余從田間來公自以荷特知又父子皆三事益奮  
報而丙申不臘悲哉 上震悼備卹典祭溢于例  
二贈少保任子中書舍人謚文憲遣尚寶丞張乂

徵董營兆儀郎周傳誦護喪歸復諭 元子陳閣

老侍若講讀若冝卹其喪 元子恭命遣中官致

金幣此故事未有嗣子光譔以黃太史輝狀請誌

余自籍金閨則與公密夫何辭公姓陳諱于陞字

元忠曰玉壘則所自號蜀南充人先繇閬徙出宋

秦公後而可譜者始祖彥良迨元至正間有興祖

者為公九世祖興祖生思誠思誠生文質文質生

平平生紀紀生衡大理府訓導衡生信歲貢生信

生大策大策生太傅文端公以勤是為公父衡信



大策皆以太傅貴贈光祿大夫少傅兼太子太傅  
禮部尚書武英殿大學士太傅為檢討時生公于  
京師時室中有數人皆夢仙樂擁一羽人自天而  
下幼慧讀書如夙習太傅舉子多殤不甚程公而  
令以意學公有所綜采綴譔輒如太傅旨而太傅  
益喜以為真類我也年十七舉辛酉鄉試第四人  
戊辰舉禮部第三人對策高等於是余始奉公游  
共讀中秘書人目公為閎覽博物君子試輒冠倫  
而太傅則引避不閱卷謂童子何知能屈天下士

徐文貞咲曰公何不學祁大夫庚午授編脩尋充  
世宗實錄纂脩官而時太傅已有所不可乞骸歸  
公扶侍還壬申如京師又充 穆宗實錄纂脩官  
成陞脩撰無何以太夫人憂歸丁丑克日講官已  
卯敘講讀勞再加俸一等庚辰太傅年七十公謁  
告詔有司存問太傅而賜公錕幣乘傳歸大臣七  
十存問者昔未有 上以相臣特起而又以公在  
講席非人所敢望焉公集理中耆舊任太史公瀚  
王恭節公廷凡十餘輩為高年會身行酒以歡太

傳時謂之蜀耆英也太傅雅愛嘉陵黛玉山構樓而游公集唐人咏江樓句若干首命童子歌以佐觴癸未復召日講趣入京壬午擢洗馬乙酉典順天試已進侍講學士丙戌秋奉太傅諱賜鉶幣給驛而所贈卹太傅甚厚己丑服闋復召日講俄加詹事兼侍讀學士掌院事庚寅疏請立東宮辛卯加禮部右侍郎掌詹事府事壬辰典會試尋改吏部右侍郎又轉左其為侍郎皆兼侍讀學士而又嘗教習庶吉士癸己滿三品賜鈔錠牢醴廕子入

胄復同諸臣請冊東宮雖未賜俞而出元子講學有力焉又請上朝講如異時不報是秋擢禮部尚書兼翰林院學士仍掌詹事府事公既世為史習國家之故念人間獨傳里巷書久彌失真請及時脩正史信今而傳後詔允行甲午春感疾乞歸不許夏五月詔簡閣臣吏部擬若而人而不佞濫竽上憶徃歲嘗兩有所推擇令並列名乃命公及不佞皆兼東閣大學士入叅機務特簡也以是故上惡吏部專逐郎七人公逡巡不敢拜再

為請且謝而後拜居無何條六事以聞曰接大臣  
用人才獎外吏清邊餉諸將材選邊吏略謂肅  
皇帝之精明而晚歲吏貪沓夷戎交侵以倦勤也  
惟上亟脩朝講召對之典振綱紀決壅蔽召還  
遷謫可用者用之而賞罰隨焉百鷙之中必有一  
鷙人情重內輕外行取之典安可獨遺州郡太守  
治行高者可入為列卿巡撫寄重可參用內外官  
惟其賢歲入有限而邊餉增無休簡主餉郎而重  
其權則虛冒覈將帥國之爪牙宜令卿大夫各舉

所知而更于武舉外別為途以蒐之緣邊吏擇人  
與地宜者往令益習虜待諸道及開府之次垂萬  
言皆公素所籌量而節適者也上嘉納行乙未  
甘鎮大捷推本閣臣功進太子少保已滿二品進  
太子太保賜賚有加仍錄一胄子是冬上怒首  
鎬遷其責于言官落籍二十餘人公與余輩密救  
者再露章者一而丙申春公偕余又專疏公謂  
上所以不言罪諸臣乃諸臣各有職或在留都或  
奉使行郡國多抗直而槩以不言逐天下且謂

上實惡言而名為不言斥之也意上稍解而竟  
不得然中外同聲曰直未幾乾清坤寧宮災同寅  
叩內殿請面不獲各引罷不許然因是多時事之  
感矣公素強善飲至是絕不進形亦日減冬至從  
南郊感寒胸中壘魁不能開無幾何遽以困告馳  
往視之已易簣不及一執手訣也蓋公門素嚴內  
言不出必自謂何遽死而死不及召其同心友即  
家人未聞有遺言悲哉距生嘉靖乙巳享年五十  
有二公雅無忤物被容接者溫如春風而砥礪操

持凜有雪霜蓋余自館時公嘗舉其婦翁言識人  
多難立朝余敬書紳而公之門自初至今無懷金  
無游刺家幹短褐無騎奴雖生富貴衣不華錦食  
不兼味泊然惟墳典是耽詩文則鏗然鸞鳳和爛  
然金石鏘色澤脂腴不似其處居奉享之約也注  
心經世若往代典制朝家令甲與名碩之所規條  
攷鏡甚多故創正史之議比察大政以國家為身  
任故事首揆制斷決不得輒參而余輩故同年同  
心大破常調公復捷敏益杼發其生平抵掌奮言



余常推而佐之幾一旦為所欲為也顧公在直數  
視日遶床走不休疑苦拘束云而余言公無能造  
膝一吐胸中竒外莫信于人充室歎憤其何能居  
竟以此死也本朝相君子取高第者自陳王焦劉  
來雖成都之博雅尚不免于口比世尤甚而無不  
帖服公誠有以服之士大夫嚙于中外幾二十年  
公入而稍輯亦善調劑辛甘燥濕之效易名時僉  
言惟勤學好問博聞多能可狀躋之宋金華彭安  
福費鉛山良不忝矣太傅公元配王夫人而公出

于賈夫人王夫人育之舉鄉時尚未知為賈出賈  
又不及公之遂而逝以公滿考亦贈一品夫人婦  
翁即王恭節都憲內君封安人累贈至一品夫人  
繼馮累封如王夫人子二光謨年十二殤側室丘  
出光謨太學生側室王出聘王方伯續之女方伯  
即恭節子女二皆王夫人出長適嘉興守崔行可  
孫諸生麒次適祁州守張應徵子多聞所著有萬  
卷樓集若干卷本朝相公獨公家父子太傅患無  
侶尚川觀十餘年公有同人且黑頭中道夭先是

彗犯中台占大臣灾主益州嗚呼天意不知何若  
銘曰益部山川厥稱玉壘峻發峨眉皎臨錦水惟  
太傅公截業其崇委神降體黃閣清風久直金華  
批經析史感契 聖衷盖垂二紀晚收其實斯應  
簡在惟陟繼尹阿衡者再太傅要說嘗如陝州公  
亦貢函于先若謀家無織葵門有雀網為國樹人  
樵蹊不枉嚴六為七曰惟三長創義設例卑觀漢  
唐兩歲平章中流砥柱為霖苦難御風何易來從  
羽瑞去應台缺公則有天民胡所望凡稱世家厥

休同國我知箕尾靡宵不北高山崇丘賜藏在此  
勒頌垂長是文憲所

楊次村司馬謚恪愍墓誌銘

我庚戌之事無過漢霸上唐渭橋而懲己巳之虐  
談色自變當是時司馬不敢下魚符亦量虜深無  
久理善持之我兵四集必走金注不宜與瓦同耳  
吾于下司馬尚悲而况楊公楊氏本長沙人  
皇時諱順者以尺籍隸南京神策衛順生受徒月  
府左護衛是為公高祖受子福勝昭皇時徙金

慶衛後徙彭城衛彭城衛者今七校也以其故家  
京師福勝之子春春子志學官至資政大夫刑部  
尚書贈太子太保謚康惠推恩福勝春咸贈大司  
寇而福勝配周春配王及康惠配王與陳咸夫人  
康惠五子長為公名守謙次守約貴州左布政使  
次守魯陝西右布政使次守讓長蘆鹽運使次守  
朴南京左府經歷兄弟並大官以清約聞君子謂  
康惠善名諸子公字允亨號次村七歲善屬文器  
局凝重嘉靖戊子己丑連捷成進士授屯田主事

改職方歷員外郎郎中練習邊計扈 肅皇南狩  
還陞陝西按察副使以備胡羅康惠艱服闋督學  
於陝秩滿拜叅政未到官擢右僉都御史巡撫山  
西尋改延綏延綏三年選將練兵講武足食益埤  
之薄者數倍增置臺堡百數虜不敢牧塞下嘗一  
入大衄之璽書褒美庚戌春以副都巡撫保定甫  
至保定而虜入通州薄安定門大震公投袂起率  
所部入援方是時 上坐法宮急聞公至大喜就  
拜兵部右侍郎兼右副都御史提督中外諸軍事

與希忠鸞協力捍禦希忠者朱成國典營兵鸞則  
仇咸寧狠鷙陰賊人也以大同帥入援善大言撼  
上又詐稱與虜戰時上首功而本兵則丁公汝夔  
申徹守備公則薄虜營而陣孤軍後單堅壁以待  
其瑕虜亦由此不逼居二日漸引去鸞欲自脫死  
又脩甘肅怨于公嗾宦官宮女哭上前言將武  
師力而為文官所牽不得奮上震怒謂守謙名  
勤王實擁兵自全遂及丁公皆廷訊坐死即日斬  
西市公臨命曰皇天后土知臣心且岳武穆于肅

愍而在未知計誰是 上聖明為邪臣誤時八月  
二十六日也都人號之傾市越二年而鸞亦以是  
日殛人謂天報太奇云鸞敗時 上既悔未及理  
而隆慶改元用都給事辛公自脩御史王公好問  
言贈兵部尚書謚恪愍賜祭葬錄一子國子生海  
內為舒憤云公為人孝友天至居親喪哀事庶母  
若母撫庶弟妹若同生祿不入私橐燕居必莊束  
身理家皆有法好施予三黨皆河潤而亢勵潔廉  
蕭然如寒畯文章有氣格詩亦悲壯尤好邊畫有



大寧考紮荆考花馬池考兵部集生正德乙丑年  
四十有六元配王氏贈夫人繼趙呂俱贈宜人三  
子長汝潔辛酉舉人高郵州知州娶趙文學女次  
汝滋即恩錄者判寧波府娶周處士女俱贈安人  
側室林出公見背時林年二十餘而茹荼勵操撫  
二子成立為時聞人林之力也季汝泗郡諸生娶  
貴陽知府林公女側室薛出女一適通政使吳公  
子都察院檢校繼志呂出孫男三沈一貫曰國家  
都薊門控虜咽喉亦數中虜曩宰昏黥獨視賄輕

重以傾天下乃虜至首鼠持兩端惟上是刺安

所得兵略而奏之急則嫁禍于衝以苟霽威偷視

息又竊虎以煬其權蓋嵩與鸞皆出此計當是時

雖有伍貞廉頗李牧之略不能勝太宰嚭郭開之

奸駢首就死寧何異云且勤王者戮奮議者貶煬

竈者容請劒者誅何以觀天下而又虛新營制以

為聲疲入衛之卒益之過更踐更以重其困財力

交竭迄今救之不勝貪人敗國有如此尸兩司馬

足以讐四夷謝九廟乎楊公非命時穆皇方龍

潛心寬之比新政遽詔原省而順天長沙祠鄉賢  
西安延綏祠名宦光昭俎豆可不謂伸焉而關中  
人有病之帝所見公方為貴人如王者生為忠臣  
沒為明神有之矣葬時以一柳車于都門西之原  
未有銘銘曰有碩楊公世載淑美慶閥承韋德庭  
趨理起家題柱曲折典稽麾蓋西遊衣冠羽儀爰  
開幕府爰揔戎重獨控嚴關漢威雷動何圖釁凶  
犬羊夔吼火照甘泉軍營細柳疾驅入衛若救灼  
焚不辭焦爛播益萬分驅羊啖虎臣肉足食彼譖

者何播茲毒螫心雖如丹赤實誰知含識懷靈未  
有其悲後命渙回深憐頓減義士隕涕貞魂氣闕  
我敬斯銘觀止何因過丘思人萬禩永存

資政大夫太子少保兵部尚書趙劒門墓誌

銘

代趙大洲師作

公諱炳然字子晦先洛陽人宋進士致中知隆慶  
府兵亂家焉而隆慶府今劒州也故公為劒州人  
數傳佐憲宗時知西平縣佐生思濟思濟生松是  
為公父贈如公官母鄭氏贈夫人鄭夫人以正德

丁卯十一月夢月而生公年十四補郡諸生二十  
一舉鄉試二十五第進士除新喻令均里甲抑豪  
橫催科責逋皆有法庚子徵監察御史懼鄭夫人  
喪起按宣大時兵興錢穀漫漶不可稽劾罷不法  
吏若干人宗室有通虜者發抵重典上嘉賚銀  
幣陞俸一級改按順天以父喪歸起按雲南沅江  
苗那鑑為難方伯徐某死之公至則別情罪示威  
福剪其外援散其內黨卒得元兇首沐國病無子  
公詣之曰即不諱誰當嗣者曰叔朝弼卒之日公

以朝弼聞而沐夫人詭言有子在別室不知公已  
審矣癸丑按浙江浙邁倭而直海副使及叅將皆  
東居寧波西不得顧嘉湖於是奏設嘉興兵備與  
海鹽叅將畫地而守之乙卯遷大理丞少卿尋以  
僉都巡撫湖廣大工興取材于楚而楚饑公疏蠲  
賑採辦亦集丁繼母王憂服未闋起佐院陞副都  
侍郎督撫浙江時倭寇閩公命備溫處比公至賊  
亦至盡殪以歸先發故有功也賊在沙瑄公約閩  
夾攻而失期諸將欲遲之公曰彼得風揚帆去耳

急擊勿失既捷再賜金幣方是時浙人始稍息肩  
公乃定兵制為浙東西舟總六步兵營八奇兵隸  
標下者二約曰寇至邀之海上受上賞併力于陸  
者次之小至水陸兵夾攻大至標兵盡調戎伍益  
覈而歲省餉二十餘萬徵科始輕其隼陞右都御  
史兵部尚書協理京營乙丑總督宣大賜金幣麒麟  
服罷其不任者總兵一人叅遊十餘人虜犯西  
陽河入鎮川及施家衝三戰皆捷秋黃台吉南下  
公聞之自陽和一夜馳百八十里至東城虜薄城

下有錦袍金羈者一人來搏戰射殺之虜號而去  
衆欲馳之公曰止虜失利當不去也可備居庸明  
日我兵抵關而虜果至見有備去其年入為本兵  
加太子少保資政大夫公故病胃用事南北益甚  
會上新立未敢去久之益劇乞骸骨歸俄復召掌  
南臺命及門而公逝三日矣遣祭起墳贈太子太  
保任其子配王氏封夫人子二居敬即任子居仁  
殤余觀公在宣大時條十事論兵耗不實京營條  
七事如實伍裕儲練技皆至計至論漸入事言督



撫與將帥同賞乃有贗功與將帥同罰乃有掩罪  
故償事則將帥之罰宜厚論功則督撫之賞宜薄  
夫公身為督撫而抗是論可不謂忠哉公余同年  
也來徵銘余于衆中持營議未決令余益思公銘  
曰兵者危事孰圖其全公歷戎行久而愈堅南淨  
滇雲東清海壖北懾裘膽狼烽不然參釐戎符一  
本樞權執籌典鑰厥伐懋焉赫熹寵命光于新阡  
嘉議大夫禮部左侍郎兼翰林院學士瞿昆

湖墓誌

代李石麓師作

隆慶三年七月二十一日嘉議大夫禮部左侍郎  
兼翰林院學士致仕瞿公終于家 上命所司議  
卹典贈某官謚文懿賜諭祭命有司營葬子汝稷  
以太常陳君狀來乞誌公諱景淳字師道人稱昆  
湖先生蘇州常熟人也高祖某以仲子貴封武選  
郎生欽欽生柳桺生國賢國賢娶秦氏生公公為  
人恬愉悃悞其貌孱然中洞了絕倫守節無所遜  
鞠躬君子也十月能誦關雎八歲屬文十歲為諸  
生甚困嘉靖癸卯無錫華公攬其文于棄簾中異

之始舉于鄉則年三十七矣明年試禮闈第一奉  
廷對第二名振天下天下嘉華學士知人釋褐為  
翰林院編脩戊申知制誥壬子奉命授中人學  
癸丑滿九載遷侍讀壬戌進侍讀學士總校永樂  
大典會南京祭酒闕以公為太常卿往乙丑擢南  
京吏部右侍郎攝禮工二部丁卯今上以禮部  
左侍郎兼翰林院學士徵公至楊州病不進乞骸  
不許會立皇太子贈大父父如其官贈大母母  
封配皆泮人又錄纂脩永樂大典勞加俸從二品

戊辰如京師而病益頓疏再入得歸始鄭王上書  
諫肅皇詔繫王王其世子公副恭順侯吳其冊  
之世子拜以金不受餉公公又辭吳亦以公故無  
所取而肅皇方怒鄭事陰薦之吳已聞大驚曰  
微公且得罪公曰某時心知其不可未慮罪也是  
時吳越被倭乂而嚴相與胡總督善曰胡材辦此  
顧吳人善毀多言賊勢張賊何遂如吳人言公曰  
某從新南來見賊公行境上民竄匿不得休又日  
夜苦徵發冀一日賊退偷視息豈好亂哉假令難

未已上問誰舉任胡者於相公何如嚴相色沮然  
心寔慙公其在南銓屬吏張某數撓公無何大赦  
群吏人謂張且罷公不肯曰憎吾私也黜陟公也  
吾不以私害公公居南未嘗以書抵政府迨從維  
揚求歸自以不得入言當世務貽余書曰今天下  
稱平且專邊塞之計廣招材略令在朝各舉所知  
雖草野豪傑可羅而致之不然卒有金革之事孰  
為天子用民生之不安吏不職也頃汰黜幾盡然  
治道去太甚錮人盛世非惇大體夫尺有所短寸

有所長隨材畀官誰不可使必求其全位皆可虛  
書累數百言嗟乎公雖不及兼用亦可睹矣公初  
以毛詩進在翰林又研精于春秋為文雄渾深美  
常依于正不雕琢而成尤長于制科國朝二百年  
推長洲王鏊毘陵唐順之及公而三始沮棄于時  
心自好不變及遭時妙天下海內學者不敢損益  
一字師心不阿與聖冥合甚哉似其為人又善以  
文知人分考會試者四主南京鄉試武舉會試者  
各一所羅多名士雖不肖亦廁末行嗟嗟方欲奉

餘教從事而茲已矣

銘間

通議大夫兵部右侍郎兼都察院右僉都御史竹墟屠公洎配泚人陸氏章氏合葬墓誌

余嘗慨古人不可作乃於鄉目兩屠公兩屠公者簡肅依日月之際成貞亮之勲載在國史竹墟公中廢蘊璞自珍即密游有未知余安能無言公諱大山字國望高祖子真曾祖瑜瑜子瀟渭瀟累官太子太傅吏部尚書謚襄惠而高曾皆贈如襄惠

官渭生僞是為公父慕庵公父祖皆贈如公總督  
時官母王贈泚人繼母陳封泚人而加太云公兒  
時為襄惠所竒十二而喪王母明年陳母來又明  
年而慕庵公卒即齠年稱孤子顧自負就里師吾  
伊不絕二十二舉于鄉明年成進士知蜀之合州  
公至州召問父老盡得所為陽橋狀者次第剗之  
豪咋舌神公而鄉聚間人人喜屠使君活我也城  
當瞿唐口水嚙之且壞公手重石以準役夫率辰  
至酉匝月而隄成已遷南刑部員外郎郎中出知



吉安府王尚書子亡賴公廉狀核也剪其翼尚書  
子用洗行稱儒生王歎曰吾則子而屠若為之父  
德公不輟已副按察備兵徐州徐有盜負嶠吏亡  
敢何公親鼓而覆其穴小吏某者甘司空里子也  
以屬公而賊敗甘望之會有盜剽上供金甘持使  
者失盜不可以遷官公是以在徐八年已叅山東  
政按察廣東轉山東右轄闕左轄時甌寧李公方  
祭酒南都有嫌於將樂令也屬公斥之公不憚曰  
夫吾安能委蛇貴人意也顧薦令越三年以副都

御史巡撫湖廣苗吳氏許氏擁衆起公會蜀師貴  
師擣其巢平之賜金綺於是李祭酒驟貴入為太  
宰用將樂令故更重公推工部右侍郎而袁州子  
為政耽耽也曰何物屠豕吾所為擁甲盾作茶壘  
峙門行酒胡為者丞不吾識耶嗾御史劾公以故  
職撫湖南協理征苗而會河北盜李邦珣與其妻  
馬三兒以妖術起公遣應山令葉震亨鹵其副遂  
馘邦珣滅之御史胡宗憲賀公曰吾為公上功此  
足以塞袁州口矣公謝不肯久之乃以兵部右侍

郎熊右僉都總督湖廣川貴軍務苗有龍阿仔為  
患全楚騷然公命叅將孫賢啖其黨譚細奴者而  
獲阿仔以歸盡殺龍氏他龍氏又盡殺譚氏苗悉  
平官細奴為百戶於是時公回翔楚中久矣而李  
亦再入為太宰復以南兵部右侍郎推袁州子益  
恚曰李輒入輒推屠若固樹之我固推之會倭薄  
姑胥急則又以公仍故官提督南都諸軍事夫公  
業總督矣司馬矣而南又提督也袁州且甘心公  
何論格哉公指天曰國家不幸有事臣宜死奮益

力夫何而南臺省交劾公逮詔獄且坐死 天子  
方坐西齋從容與陶仲文語仲文能言楚事此忠  
計臣不可殺 上感其言手批趣赦公時漏下四  
鼓矣公蓋素無慙而冥冥有拯之耶公得歸倏然  
耕東海上時游酒人曰主上至仁而活臣猶載齒  
髮侍諸公飲敢忘 上賜優游于遂初堂者二十  
五年而視柄臣敗又兩受恩詔還冠裳也嗟公經  
營天下三十餘年骯髒磊磊而不盡其用若此元  
配陸洲人者大司寇康僖公從孫年二十歸公善

女紅諸姥常傳相駭曰是織女機中物身出甲第而茹淡衣素侍姑疾手湯炳扶掖醇謹乃爾繼配章淑人翁州望族亦以二十歸公能讀孝經內則精女紅旁及家人產廩靜儉恭公督湖南時苗帥冉世蕃求代父行金寶于公家泚人語暖曰而父廉苗安得溷我叱吾訊諸官苗踉蹌而逸此泚人之志也世丈夫顧畫攬宵乞豈不愧哉公生弘治庚申卒萬曆己卯年八十陸泚人歸八年卒于合州為嘉靖乙酉年二十七章泚人卒于某年得年

若干子一即本峻刑部檢校章出娶審理黃伯康  
女女五一適別駕毛思聰一適包貳守梧子諸生  
仲岳陸出一適太保聞莊簡子太學生思治一適  
舉人金章子太學生鳳翔章出一適范少司馬欽  
子太學生大冲側室陳出孫男一惟霖娶光祿監  
事聞繼美女孫女三一適大學士余文敏子廷梓  
一適柴方伯涑子以鼎一許不佞子泰淵先歲已  
卯葬公陸淑人于江北原茲以章淑人合沈一貫  
曰余于屠公晚嘗侍公未談生平公既沒峻始補

綴以為譜余君房為狀王元美誌長卿傳倪廣文  
遺事猶不若公臨終自贊數語語曰斷念斷意混  
元合炁外緣蕩滌內景密閤寂照煌煌無隙可覩  
天地勿違神鬼盡避禪邪玄邪通性命之故迈造  
化之初八十年之力盡是矣公生平無疾言遽色  
門無雜賓室中無長物初庇先人廬燬不能復厓  
葺東北隅自敎出入行瓦鑠間狀脩偉嚴肅下頤  
長髯如神明而里中孺子咸附愛如父母於人無  
所不退讓而不可得其一言之譽施舍無所吝而

不可得其一牘於有司燭然終身而不自表白陰  
行善而不言功不唯呵而使人嚴幾有道至人哉  
故其自贊若是而人莫之知也嗚呼是人不可作  
吾安師士未有不植本深而閑建堅者也而今之  
彪炳翰墨間者皆華葉非其本其稱本者口性命  
以為高余聞至人之游惟恐人之名之也而逃之  
深是故無得而名焉是故余之志屠公也異于諸  
子不于可名之名而于不可名之名雖然屠公而  
知余之志也不將吐曰是子亦多言哉



南京刑部右侍郎敬齋張公墓誌銘

有封若堂於碩穀山之陽者故南京刑部右侍郎  
張公也一貫追而志之公諱岳字汝宗別號龍峰  
世稱敬齋先生家於姚自宋禮部尚書永子萬始  
高祖廷玉封承德郎兵部武選司主事曾祖時澤  
中憲大夫潮州府知府祖萊衛經歷父恒封朝議  
大夫雲南左叅議母蔡恭人同產三公居仲以禮  
記魁戊午浙江明年舉進士授行人奉使慶藩標  
百金之贈弗受滿三歲以高等給事禮科巡視庫

藏發乾沒之奸進刑科右而暨盛者從 肅皇興  
國來奄也憑寵沒利盜香貲鉅萬以火聞公得其  
實抗劾之時皆危公而 肅皇神聖杖其黨九人  
暨雖舊恩猶杖六十戍南京中人靡不目公者公  
又上六事曰議宗祿訪真材止開納覈部差遏奸  
宄辨誠偽所謂辨誠偽者為時宰華亭公方講學  
而巧宦者徑焉故斥於是大司馬楊公杜門埽軌  
辯 上勿問已轉工科左清節慎庫摘都水郎奸  
事又上書言館選宜每科一舉冊封秦藩秦王雅

莊公之議宗祿也有加禮公謝如慶藩將復命京  
師而忌者畏公口遂叅議雲南公便歸為二尊人  
壽之雲南雲南產黃白金吏倚上供為奸公首斥  
其樣銀而按其不法勒石為例大理僧有釣淫者  
至中分民室公發屋闕地得而寘之法苗鳳繼祖  
負險自固官軍不能克購之際首自歸而將士掩  
為功公不可夷熱其信久之副使江西飭兵于九  
江九江羯夷又多盜公至則胥與盜通也悉瀦之  
行部至安慶見士有饑者勞之曰吾欲用若命而

不支若是不虞脫巾乎為之調食而簡銳然後下令創鷹船廣偵伺計掩覆自富池下陽磯商旅夜行尋奉勅督上江漕廠禁補造議料價嚴程限均派編漕務為清番盜李天爵者剽淮藩繫世之珍擄星子戕尉令公語楊守備曰是可覆而取也扼諸湖而陸設覆以待擒之上詔紀錄且并以饒康諸道捕馬所得廩餼多封還庫藏有張氏無名錢百千緡安慶指揮張志學讎其守查志隆以兵圍之急公曰需事之賊也我急往而徐圖之易益

成師以出是一其貳也挺而馳乘城矣公詰之故  
且告之撫衆始稍引去其不下者給之饗因擁輿  
出及衢而騁逆黨知敗始鳥獸遁巷皆柴無可之  
悉縛 上賜白金文綺已叅政廣西故人德公者  
以三千金邀諸途公卻之宦粵者倚辦經紀因而  
齟齬人守令弗敢問公按如法俄罹父憂再補廣  
西改河南而有喬際時之亂際時劇盜以白蓮教  
部衆將嚴究公先期警衆往潰之撫臺欲當盜族  
公力爭所全活千餘人論功擢太僕少卿改大理

左少卿旋遷南京都察院右僉都御史時長星見  
尾箕而金陵諸僚謀止江陵相勿奔喪公謂屠祭  
酒曰楚少年固狂也老大者亦復爾邪乃却奏弗  
署而獨上疏謂臣子于君父等耳元輔受國恩誠  
重而父死不喪謂天倫何臣謂奪情為權奔喪為  
經宜兩全勿偏廢不報而一時諫奪情者盡重譴  
南御史朱其棟之削籍公饒之江初南中操院秋  
甚公捐帑拓之而江陵黨因引以詆公遂鑄一官  
外補歲己卯仲子集義舉于鄉江陵忌彌甚欲錮

公而其黨與公先後為操江者遂托鍰事傾公至  
閑住矣江陵亡人始交薦公叅議四川俄為太僕  
少卿都察院右僉都御史巡撫南贛虔南軍興素  
饒懸千金以待有功而後官鄙常沒為私公盡裁  
弗染又覩掊剋之臣募銷兵名而不知變疏言之  
上皆嘉納地多火又惡虎公創玄帝祠以填火而  
躬祀以禳虎有滅火渡虎之謠王文成之填虔也  
初精舍時屬士民飲射讀法其中公踵行之俗亦  
隨化甲申以左僉回院首陳明良交儆之謨又條

政要四事乞錄忠言銷寃憤於是張大司馬去官而劉光祿臺錄子言官生色已進左副都而經始壽宮言者欲改卜引公為重公因發憤直陳多忿激譏刺之言於是有南京刑部右侍郎之命公不往幡然歸里中歸則與諸先達巾車棹舟為汗漫游獎予善人及群從之好學者不復問世事矣公為人孝友天至嘗婉娛太恭人太恭人安之家有遺田若干畝悉畀昆弟與人交無少長皆顓禮袍布韜革或規之置田產為子孫計公笑曰幸有田



一百畝足矣所著有性善解太極通書等釋周易  
辯疑行于時旁及天文地形相卜琴奕之屬多喻  
人者歿于萬曆戊子壽五十六配王氏累封恭人  
生四子長體仁娶周氏繼胡氏次集義丙戌進士  
三為華亭丹徒常熟令皆以才調娶胡氏行太僕  
卿維新女次約禮辛卯舉人娶管氏次近智庠生  
娶周氏一女嫁中舍呂公采子庠生悅六孫夢龍  
夢麟集義出夢松夢獅夢桂約禮出祖廉祖直近  
智出夢麟聘丁氏春元履泰女餘未室一女孫壽

體仁出未字公所際三相公有辯矣而公皆齟齬  
吾何以名公哉余讀史至唐子方呂獻可世推其  
直譏彈金陵當矣何乃及文歐兩公豈親見兩公  
尚有所不滿抑賢人得它山之錯益賢邪余謂名  
諫臺與賢宰執不必悉比同無是非以水濟水誰  
其食之且敢言之士遇事輒不忍忍即不敢此汲  
長孺所以得戇稱也嗚呼是公其中皎皎無私真  
是多者安得起於九原銘曰世人皆汶汶沒于利  
而公獨不以利淫世人皆跋跋屈于勢而公獨不

以勢侵矯英稜披葦葦駕風雲之上而恥與俗尋  
是山川之特造化之隻古也非今使公載耆載考  
載順載葆元氣其斟酌短業韜夜沉沉我銘其聊  
懷夙欽

嘉議大夫河南按察司按察使李于鱗墓誌

銘代殷棠川師作

余歲已已誌于鱗大人墓才一歲爾復誌于鱗悲  
夫夫于鱗豈不隆隆乎勝流耶即千載我知其猶  
今也于鱗李氏攀龍名父贈中憲大夫知府寶寶

父端端父禎禎之先長清人家歷城自清始端以  
賢雄于鄉鄉人至今有伏臘祠而父寶為德懿王  
典膳娶于郭生二子繼室以張生于鱗及二弟其  
父卒時蓋母張年二十七爾茹荼以活諸孤至壽  
考封太恭人語具余前誌中于鱗初太恭人夢日  
入懷而生九歲而孤又九歲為郡諸生廩焉當是  
時則所刺非時師訓故語人相與號狂生生自謂  
非狂矣庚子鄉薦第二人甲辰進士第乙巳疾告  
丙午還京師典順天鄉試簡拔多雋髦丁未授刑

部主事三年陞員外郎明年遷郎中其為刑部有  
邊將觸法不至死當是時分宜公子弼其獄不售  
必寘之辟竟不能奪之于鱗其後邊將果大著勲  
伐矣癸丑出守順德順德無留獄部使者至才一  
日讞罷使者嘆曰太守安得不冤若此比三年有  
十數最書擢陝西按察司提學副使所風士又多  
于鱗為人素羸不習西土西土裂後時時動搖不  
已心慄又念太恭人恩歸矣會中丞某以牒來責  
文遂敖然發怒曰余而胥史耶而蘭易若是遂乞

骸骨故事外吏無病告告即罷不敘時銓部才公  
取特旨于告病已且復敘以異日何仲默例例于  
鱗異數也歸構一樓于華不注鮑山之間曰白雪  
樓于鱗為人高亢有合已者引對昏旦不問不合  
輒戒門絕造請數四終不一見之亦不自駕請謝  
其樓居獨所與為總角交者余及許長史殿卿四  
海交則王元美徐子與吳明卿數子往來觴咏其  
間凡十年所今天子用言者起浙江副使二年遷  
叅政入賀過家觀省太恭人尋按察河南載太恭

人俱越四月而太恭人卒于鱗哭不勝六月行澍  
雨中持喪歸初于鱗自關中歸屢遭奇疾不死至  
是人憂其死孝亦不死小祥漸平無何再日病而  
死歲庚午八月二十日也年五十有七所著有白  
雪樓集他詩尚若干首未出或問殷子曰王子曰  
律至仲默而暢獻吉而大于鱗而高要之有化境  
在古惟子美今或于鱗雖于鱗亦自謂擬議以成  
其變化矣于鱗信才意不至所稱乎殷子曰夫親  
見楊子雲者肯信桓譚之論哉余嘗謂于鱗雄渾

逕迅掉鞅于詩壇雖曰擬議蓋傳會龐襍若獻吉輩者乃能不為獻吉輩者然于鱗方且痛人詆其文辭相矜不達于政游刃引割所至弦歌亦治操槩凜潔耻為色澤稱其為文于鱗有以死哉于鱗妻徐氏封恭人有二妾蔡氏盧氏所生三男一女駒娶曹氏女繼娶應州知州馬應奎女采殤駒所聘即許長史殿卿邦才其名女適永清艾訓導之子芹獨駒盧出他皆恭人出駒有三子二女鴻仁聘進士于某女鴻儀鴻儒俱未聘女一許舉人王



見賓之子衡一後公七日而生嫁艾氏者有外孫  
曰維高駒卜某月某日葬公于某山請殿卿狀來  
乞銘駒也亦才竟其所之可使千里無契需銘曰  
爾祖有言死而不亡豈于鱗與吾生有涯知也無  
涯鬱而為書剗削巧利滌濯滓垢追趨古初大者  
天行雲盤星迴小者綺疏績舊彌新忽入倏出霍  
然霧除赫赫厥聲施于當世海內寡如豈惟文章  
以緣吏事罔試弗理入掌庶獄出典大邦柄文持  
紀書獄獄平治人人安風士士起鴻飛冥冥羅者

不忘思儀其羽曷篤其生曷留其成不遐錫祉壁  
傳士林脫委斯歲永憑其里

戶部雲南司員外劉見台墓誌銘

今天下所尊者進士科不可以地得自海內稱望  
族厚訾藉者乃用他途進索父子伯仲趾相錯于  
賢書者或數十城無有於蜀內江劉氏乃多顯近  
事諱望之者歷大理卿累階正議大夫資治尹其  
二子翺亞中大夫吾浙江叅政持憲視海翩奉政  
大夫戶部員外郎今正議老亞中獨懋而奉政天

造物忌全耶亞中謂余余仲君同年友可無銘哉  
奉政者字仲翰翹其名正議為杭州理始也以嘉  
靖九年三月朔張泚人誕于署中九歲屬文明年  
補邑弟子名輒與兄齊戊午舉鄉試第二人人曰  
劉生實第一御史治他經後之耳又十載而第戊  
辰亞中後之發先之至君成進士則亞中為御史  
行畿以北郡縣而君得滑令與亞中熟燭而論理  
每畢一事輒手籍旦而溢緘滕其潭思如此之縣  
輒有聲右文左律惠民威吏邑多權貴人相戒以

為劉侯法不可嘗毋憚歛手盜發跡捕則竄籍於  
獲嘉伍中為獲嘉隸河南滑不得問也君度可下  
者下之不可下輒以他事弋之莫能脫部使者剡  
君狀凡七八曹稱三輔第一而當路有所惡發怒  
于君竟貳撫州父老道呼曰安得我公而以撫州  
去也哭祖百里鐫其事于石其往撫州會守與令  
皆闕左右綬而治日出而入郡堂柄庶紀日中視  
邑事延問疾苦議興罷日入而脩丞業民歌之曰  
令而令守而守撫州父金谿母而又檄監他郡縣

寄道里為治人爭質成最君者章又五上于是時  
哭子者三一男子名承祥年十三兩女子皆免齠  
而一歲夭所字靡遺矣慘慘傷神主爵以君滿秩  
階奉政大夫俄被徵為戶曹郎不拜請告以西至  
萬縣與周宜人訣曰以腹子累矣又曰故里在望  
膝下為遙吾不獲從而醵也命矣遂卒越七日而  
周宜人免身子也名之曰承元奉為喪主與養子  
某輿而歸春秋四十周宜人資縣人光祿卿冕之  
女有長女嫁諸生鄧應鰲同邑憲使林喬之子亞

中為余泣也嘗偕之塔洞灘幾覆舟而仲不恐予  
為五清祖請謚屬之草奏不再削而成大人分諸  
子財予寓書仲以故業業諸季也報曰甚善曩大  
人不以宦游貧而與諸父分世賢事在耳目今吾  
仲八年于外而無二畝田妻子庇舊廬吾仲素豪  
比仕折節治官吾以為遠顧不遠悲夫銘曰劉於  
蜀中山駒龍種千載猶權奇當轅轅轂世所推脩  
能促景捐道摘七日来復天可知無憤枉魄昌其  
遺

戚畹驃騎將軍都督僉事沈坦庵墓誌銘

自一貫舉進士鄉先生官京師者醵而觴之知有  
戚畹公居京師十有三年歲時必相造生習其人  
死而銘其幽公字于道至其名號坦菴父九鼎錦  
衣衛指揮僉事贈驃騎將軍都督僉事祖彥曄贈  
如九鼎官曾祖宗南京欽天監冬官正高祖壽之  
當國初時為陰陽正術世浙之歸安人歸安古吳  
興沈之望也自冬官始家金陵然常往來苕間雖  
戚畹公猶生歸安公之貴以父父之貴以皇貴妃

皇貴妃者公女兒也 肅皇帝八年前星未曜選  
良家子貴妃入大見寵詔九鼎為錦衣衛指揮僉  
事賜甲第無何九鼎卒長子至嚴於是公生十四  
年又三年擢指揮使又四年為今官封母顏太夫  
人太夫人持家嚴動以矜侈為戒公出入稟而行  
與季坐愛課以詩書躬騎射躍馬為驅曰 天子  
好文吾家憑藉寵靈持梁刺 肥遭也有如一旦  
誅匈奴誼當先騎縱彼絕大漠斬獲旗鼓者非肺  
附人也坐是以盡力舉武科歷署指揮僉事管錦



衣衛南鎮撫司事兄弟並列禁近 肅皇帝必祀

事 郊廟陵寢必遣公戚里莫敢望素無病迺五

月十日小苦過隔一日卒享年六十而在朝列者

四十六年夫人掌錦衣衛事後軍都督府左都督

陳公寅女早世無子更娶錦衣衛都指揮胡公恩

女三子承謨承憲承烈卒之日季君發篋中惟賜

物無以具稱亦足以見公矣時皇貴妃尚無恙今

皇帝萬念懿親賜葬西直門外香山鄉祔其先公

祭三壇銘曰金鵝鳴沈氏興千有餘年茗水清有

婉一人歸紫庭外家抑抑寵若鷺無人騎射皇塗  
平為君摯見諸明靈遣車一乘禮不盈天子念故  
祠幽城白日不啟藏斯銘

錦衣衛管南鎮撫司事指揮僉事沈葑菴墓  
誌銘

萬曆乙酉春葬葑菴沈公于香山鄉初公之葬其  
兄坦菴也予銘焉而公之葬祔公名坐字于堂先  
吳興人高祖壽之曾祖宗祖彥曄世掌天官居南  
都父九鼎娶于顏而生女為肅皇帝貴妃九鼎

為錦衣衛指揮僉事賜宅長安卒長子至龍終驃  
騎將軍都督僉事則所謂坦菴者公其仲而後于  
伯父杰慷慨喜騎射願一當行間為天子北擊  
胡凡太公穰苴兵法及占候家言皆涉獵焉弱冠  
游武學舉鄉試而上司馬門者三不第戊午東方  
益急詔發良家子公出私財募蒼頭赴薊門王中  
丞九月戰界嶺口斬首一級授鎮撫十月大捷于  
清河載露布詣闕賜鈔幣進試百戶明年虜入潘  
家口射斃一人實授百戶世龍朱太保領錦衣衛

舉為西司房理刑領緹騎君察長安持大體無縱  
爪牙三載進副千戶公雖左鞭弭右橐鞬而篋中  
皆圖書比隆慶戊辰第會試出蘭谿徐公魯源門  
魯源當世名士故士大夫亦以此名公進署指揮  
僉事掌鑾駕庫又二年管南鎮撫司事故事鎮撫  
諸衛尉謁大司馬與錦衣帥禮均時大司馬由薊  
鎮入稍詘諸衛尉諸衛尉心忿之不敢言而獨公  
言率免官庚辰哭其伯氏明年皇貴妃薨又哭之  
曰坐七歲而孤成我者兄也幸肺附典旅被榮寵

者皇貴妃也今皆已矣吾何以堪鬱鬱成疾至甲申嘉平之朔卒壽五十七夫人廣寧伯劉公泰女先卒子二長承宗當嚴常從公潘家口有斬馘功娶定國勲衛徐延績女次承官娶錦衣衛管衛事都指揮周京女孫男一子中孫女三未字狀國子博士陳君泰來所為稱其感槩亢直似烈士約已折節似儒力戰顯功名至捐其家貲晚齋志以沒無長物居處服御不類它戚里終不以外家望優異至扼腕王中丞常泣下義士哉余嘗感范蔚宗

之言人用則為虎不用則為鼠以衛霍庸力之日  
竇憲思鳴之時而念空翔庭奔稽落本末何遼絕  
然卒之為漢虎臣抗旌絕域用不用之效也借公  
而遇合 肅皇寧可知而竟以衛尉終也雖然恂  
恂行義蹈繩持式增光皇貴妃之世則衛霍遜之  
何竇之云銘曰援旗擐甲與乘堅策肥孰難而公  
不憚煩古者歌北山今願為 天子死邊吾是以  
知聖明之材雄而戚里亦多賢也嗚呼來者觀斯  
阡

武邑知縣封奉政大夫祠祭郎中鄒龍巖墓

誌銘

夫士惟無志志立則朝受事而夕拜其賜需時先後哉余覩餘姚鄒先生可誌矣先生諱名字仁甫自為諸生有大志藝精出人上嘗試為八邑首而久不遂晚以貢入則其子學柱為儀制主事矣會天子推恩先生當封而不肯受曰吾亦有志也遽以子官間我哉乃謁選得武邑尹既之官三月上疏損其社疏略曰武邑民幾五萬口而地止四千

頃地少而鹵民多而貧乃有二十五社夫社多則  
賦多而不能給臣按比縣棗彊地三於武邑南宮  
兩之新河溢四之一皆肥饒而社不滿二十五率  
四百頃一社耳今武邑社不能十頃少或五六頃  
以五六頃地而供一社之費不疲何往請比慶都  
南樂例損武邑為十六社稅畝不減而少弛幣餘  
之賦民其有瘳焉疏奏戶部言 上許之又減其  
巨戶四之一其說曰縣故巨戶四百為三等取盈  
於上則民實不中訾繭絲盡於下矣今酌經費可



減為九十戶戶無上上中自上下差降之三年而更率三年役一年民又稱大便先生既為武邑議興革問父老尚有苦乎吾為父老除之父老苦驛傳先生省其賦計駟僧以佐費而官顧役以充父老又苦盜先生申保甲十條有大盜逸界中輒得之監司下其法於諸邑其他簿正諸冗費尤多蓋在邑歲餘而省金二千皆著為經制云一日又問父老尚有苦乎皆對曰無有先生為一笑既而歎曰吾素羸疾自為令臂月減一分所以忍不去

為父老也父老幸無苦無苦我矣即請致仕而上  
官持不許會朝闕下遂上書解綬歸就儀部封已  
加封奉政大夫祠祭郎逍遙林壑之間甘糲煊布  
顧獨不廢勤也貴官人非禮不見邑以鄉飲賓之  
不得已一往已則廉訓學枉以廉蓋直方君子云  
士若此復何慚於聖人之門哉鄒氏宋寶文待制  
忠公浩後世居樣山宋季有諱森者始徙于邑之  
鄧家巷五世而生彞彞生相相生瑞善說詩以儒  
士十應鄉舉不第娶蔡襄陽欽之女生彥彥亦治

詩娶于朱是生先生朱夫人琬先生彌月卒先生  
長于繼母符自正德丙子距萬曆戊子享年七十  
有三配丁宜人縣學生下公介女子二文柱府學  
生娶金文學玄女學柱戊辰進士雲南按察使娶  
陳公如賢女封宜人銘曰士固有志靡靡者嗤誠  
服于治一割必奇孰即清途不點世資誰其食肉  
閔此惄饑矯矯鄒先赴其素期慮周民瘼朽骨生  
肌介直以勞為吏人師稍試輒收固未易知昌其  
胤君誨之不淄我懷伊人如璋如圭雖其瘞之江

山暉暉

晉江孝義先生吳公墓誌銘

孝義先生者何吳子龍徵父也吳子守侍御三年  
制當官其親而不官者何未成考也曷而未成考  
吳子有東之役制當詣闕滿而病告未克也吳子  
將宅其父而求名不得戚之矣雖然何憾先生既  
以孝義顯奚必侍御然後榮况侍御公所有哉余  
從民望私謚曰孝義先生而銘之公諱喬栢字子  
秀別號守素其先蘭陵古錫梅里人有彥博者至

元中為泉州路照磨因家焉派為六宗公晉江愈  
邊派也高祖遜洪武間鄉進士遜生禧明官九江  
湖泊所是生榮壽公思孔榮壽生毅齋公海是為  
公父兩娶有六子喬椿喬松喬檜及公皆林出喬  
椽喬柎繼方出毅齋公以倉邊煮海繇重改占邑  
中高誓為魚鹽祭酒生公十九年而歿伯偃寒公  
偶逾時乃娶黃孺人公倡倡謹事諸伯俛而戡拘  
朝簪殮而夕量饗念兩大人未就土而伯氏逋貧  
病曰是在我乃盡黃孺人裝買城東高敞地身負

土先傭作夜則馳歸鑄斤掘求稊穉為旦日計逾三月而就將窆伯氏尸虞酹酒而已又自作倚居于塋之右十斛火然後歸人指點石累累山嶺者為孝子礫亡何喪方孺人不煩諸季謂季無以資也公詎溫厚于伯季哉獨天性摯于人倫無二心孺慕奮前力以義涌皎皎為有財矣兩伯及兩季皆無樹類獨仲檜舉一子曰榮徵苦繼母年十一逸去猶之乎煢煢耳突盡如掃沁沁視公瓶中粟至干伏蜡鞵俎及里甲輸攢而倚公公有卒而辨

者有期而貫以共者總之不賴昆弟即里人不知  
毅齋公有子而六又怪公不能作黃金而徒手豪  
也伯椿年八十在牀公亦逾艾矣猶躬煬竈具漿  
醅松中天檜死于酒二季皆先公歿公所為生死  
事悉無憾榮徵既逸公跡知在始興有子晉胤晉  
肇俱補弟子負大喜日夜圖其歸曰余夢寐睇子  
自始興來也椽有女二公咸兒遣之乃尤异者伯  
病肺公亦病肺伯瘖公亦瘖伯瘖公亦瘖伯瘖公  
亦霍然人駭而為之語曰天性相屬眎吳叔即二

三同氣靡不心德公至祝後身出腹中也鄉里嘗  
望廬質成公根本分明之各意得解去吳叔一言  
立辨今季路不死可不謂情信移人之亟哉嘗過  
錦亭獲遺金稱病邸中也有譁呼怔怔然來者曰  
余售田二百鰲而蘄免余病姪楷也天棄予哉公  
笑曰子免吾病者也舉囊擲之人謝以半公曰是  
不使余與若子獨半瘡哉掉頭而去之辛壬間倭  
大訐衆人乘城闔奔者流為餓莩公負郭而聞啼  
輒縋橐下食之寧身乞隣以充曰家不炊猶安居



也孰與是悞者哉二事具旌善扁中夫公起落落  
窮巷為生難而厯取豐施較然立大節非性好之  
安能浮矯為也其後閭師序長言之監司郡大夫  
賓之以酒孫直指署其行于郡若縣之旌善亭曰  
韶聞純孝晚薦友于蓋寶錄云泉之旌善自國初  
逮公再耳而公中丞沈直指表以棹楔總先朝朱  
則文等合十五人顏其額曰孝為德之尚特刻在  
膠庠以徵後之脩乘者焉公三十九始舉官御史  
十年舉次君晚矣然不以愛弛教夕誦誦通嚶嚶

與夏楚錯施旦令就外必求名師友苦筋力奉之  
一日從所親北游燕魯數筵以歸詫人曰羸無算  
矣人意吳叔居奇偵發滕則百家言皆笑吳叔老  
而悖生匱一錢而望其子以枯竹起公不答舉漢  
授侍御曰兒為乃公解朝迨吳西侍御舉于鄉侍  
御雖遂而公程督猶嚴然躡公車則無幾微色謂  
進止固有時耳居常誦李仕謙之言曰陰德猶耳  
鳴已獨知之人無知吾生平為德非望報愧自  
耳使爾異時服官無忤斯稱義哉

釋家政

而日從十餘公結社稱洞外田更倒尊壘計陰晴  
以為樂比病革以二篋投火中曰此吾家所有可  
勿留也蓋折券云又手其幘示諸子是若輩冠我  
也若輩無負此時庚辰八月晦年七十三侍御以  
公歿之三年成進士讀祕書為今官龍徵名次麟  
徵郡庠生女二長適陳敦遠次適楊日焜俱前歿  
皆公經紀其家龍徵娶曹鉦女生三子五女麟徵  
娶陳珂女生一子三女墓在清源山負艮揖坤以  
萬曆庚寅十一月十七日葬初癸未余得吳子于

委巷中吳子負奇氣而視其人格格稟于道義則  
公之教行也公不死矣銘曰嗚呼有吳延陵嶢舉  
金贈披裘國捐敝屣旣銘杏壇乃蟠梅里有遷來  
閭復其德矩維孝義生身涼行俟莫父與母子而  
封樹有伯與季歸焉檣柱禍玉自貴蠶經自喜金  
屑為病予胡給眦翼短足伏味齏足响匱財之慈  
厥慈莫圉罔欺暗漏爰馨戴履布衣棹楔貌名後  
紀孝弟神明仁人世濟余非尼父載銘吳砥

郝廷符父母墓誌銘

郝國章廷符有其曾祖祖父三世之葬在都門南嘉靖間城為郭而葬入其中於是廷符奉其母之喪自梁來不敢入國門以與父合改卜地得東去十八里曰通州安德鄉之原者將以十一月廿四日合方廷符舉萬曆二年進士也一貫實任之熟其世廷符父威之沒于癸亥久矣而京師人至今求威之蓋威之世受醫續斷骨北人逐輿馬傷則求威之故廷符雖舉進士而旌其居猶曰威之比不死也威之有士行十四而喪其父如成人母常

病人謂疾善染少自愛君謂即染死不失為子即不染幸不死不可以為人竟百餘日不去亦不染死母甦惟君與婦兩人侍母曰吾嘗謂此兒弱兒不弱哉其為醫善以術輔仁有闢者死邏執其人去君診死者可活也邏好功更恐君君正言曰活一人得兩人之命汝不欲哉卒活其人又一少年舞刀刺人腸流出于地君徐而納之加善藥踰月而兩少年來謝曰我輩公子也君有上醫之心故名流于遠太儒人者郭姓天津人父郭公聚以郝

君才而女之自為婦輒代其姑稱孝敏姑有女嫁  
劉鵬而甚憐太孺人每進食必羸屢索于旁姑所  
嗜則饋焉太孺人少小姑數歲為嫂終身不敢與  
小姑齒廷符屢不試母必慰之其試也母更憂之  
懼廷符嫉惡甚不可以為牧廼廷符一為吳再為  
封丘而皆以善聞太孺人可無懼矣郝氏本太原  
郝鄉人舉士經仕于元自潞安徙北平諱思信者  
有寵于成祖賜名普常是為太醫正骨科始普  
常生瑄及琳瑄英廟時以醫至錦衣百戶琳至

院判院判生御醫榮御醫生儒儒娶陳氏有三子  
銳鑑鉞鉞則威之也弘治戊午生享年六十有六  
廷符遂時君已卒而又四年贈今官又三年為萬  
曆九年而太孺人卒距生戊辰得年七十有四廷  
符惟一弟早死一女弟適李仁仁以是年死而太  
孺人甚念女故不起廷符娶錦衣楊裔女封孺人  
子曰胤京女一許嫁進士浦卿子未許嫁者二人  
銘曰燕之有郝原本學士黼黻旃纛蔚彼國史韞  
積奇姿表延代祉救絛攝引補天利理孳孳贈君



服此善技不寧惟德亦泚其裏貽厥燕翼休復世  
美于歸大陸隱韓嶺嶠奮榮隤祥方滋未已

蓬溪縣知縣累贈奉直大夫都水員外郎賀

公墓誌銘

楚賀君幼殊為都水郎時辱臨不肖使其二子問  
業二子恂恂疏布所師余鄉人言賀之庭訓也賀  
君謂其子吾為汝伏謁太史公製一繒退必篋之  
毋揚揚壞我家法夫賀君世家二子綺歲而厯厯  
若此昔劉琨不以肉食食其子賀君似我余每誦

以誠余子云既賀君仕至臬使從滇南訊余曰先  
子葬二十有四年而未有珉請屬子公諱表字君  
立其先趙宋王孫也家湘潭入元有八十七郎者  
贅賀季家遂冒姓至應紳徙湘鄉又至奉直大夫  
潘入國朝潘生從政知鶴慶府沒而祀鄉賢名宦  
兩祠潘以其貴稱奉直云鶴慶生引禮官元嘗為  
掾去之稱隱君隱君娶張氏生公十七而補弟子  
員督學楊使君文卿余鄞人也於長沙獨才公與  
益陽夏寶夏上第而公亦舉甲午時湘鄉之士希

遂者公得舉傾市觀之以為旌復困春官癸丑及  
長君計偕復北而謁銓得蓬溪蓬川之瘠邑也又  
旱賦不可辦而使者旁午相持公謂古者用一緩  
二今不能竭澤而漁寧以身救罪於是民樂有父  
母而忘其歲越二載竟以事忤直指左遷觸炎犯  
潦而東歸痢作卒于長沙年五十有四其冬葬縣  
北萬歲冲又十四年而長君貳汀州考贈奉政大  
夫又二年為都水員外郎會 上登極贈今官公  
故饒于產直芥視之而不厭麤糲削迹城市督耕

課子弟發憤六籍父性嚴將承竭其力而二弟曰  
衣曰襄並資之游國子蓋孝友天性云湘水出珍  
連山稱連川居士娶湘潭羅秉章女生長君更娶  
同邑卜經歷女生次君季君長君即幼殊娶譚氏  
更娶宋氏次君幼學廩生娶葉氏更娶蕭氏季君  
幼鳴聽選官娶喻氏女一適萬年知縣龍應河孫  
六謙娶王氏敬娶尹氏俱庠生諧娶葛氏儀娶林  
氏詳聘龍氏慶保幼未聘孫女四銘曰天水濬黃  
夷為庶姓姓復不守婚繼為命宜有令聞奮揚前

烈嗟此蓬溪不忝貽厥一吏凋邑拊循疲氓均歌  
其利或害其能雖不究施尚有來嗣煌煌繼承聲  
稱鼎熾誰謂木拱英靈在今雕鏤形似以慰子心

家鳴文集卷十四終